

**BOSNA I HERCEGOVINA
FEDERACIJA BOSNE I HERCEGOVINE
VLADA**

NACRT

**Z A K O N
O PROIZVODNJI, REMONTU I PROMETU NAORUŽANJA I VOJNE OPREME
U FEDERACIJI BOSNE I HERCEGOVINE**

Sarajevo, oktobar 2012. godine

Z A K O N

O PROIZVODNJI, REMONTU I PROMETU NAORUŽANJA I VOJNE OPREME U FEDERACIJI BOSNE I HERCEGOVINE

I - OSNOVNE ODREDBE

Član 1.

Predmet Zakona

Ovim Zakonom uređuje se obaveza nadležnih institucija i privrednih subjekata Federacije Bosne i Hercegovine (u daljem tekstu: Federacija) u provođenju Zakona o proizvodnji naoružanja i vojne opreme („Službeni glasnik BiH“, br. 9/04 i 25/09) i Zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine („Službeni glasnik BiH“, broj 103/09) u oblasti:

- proizvodnje i remonta naoružanja i vojne opreme (u daljnjem tekstu: NVO), kao djelatnosti od općeg interesa za Federaciju;
- kapaciteta za proizvodnju i remont naoružanja i vojne opreme;
- uslova za izvoz i uvoz vojne opreme, proizvoda dvojne i posebne namjene;
- usluga u vezi s oružjem, vojnom opremom, proizvodima dvojne i posebne namjene;
- sigurnosti, zaštite, nadzora i inspeksijske kontrole u oblasti proizvodnje, prometa i remonta NVO;
- druga pitanja iz oblasti proizvodnje, prometa i remonta NVO koja nisu regulirana zakonima Bosne i Hercegovine (u daljnjem tekstu: BiH).

Član 2.

Za proizvodnju, promet i remont NVO, pored primjene ovog zakona, istovremeno se primjenjuju i sljedeći propisi:

- Zakon o proizvodnji naoružanja i vojne opreme BiH,
- Zakon o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine BiH,
- Odluka Savjeta bezbjednosti Ujedinjenih nacija,
- Odluka u okviru Organizacije za evropsku sigurnost i saradnju (OESS),
- Propisi Evropske unije (EU).

II - ZNAČENJE IZRAZA

Član 3.

Osnovni pojmovi

Izrazi upotrijebljeni u ovom zakonu imaju sljedeće značenje:

- a) **naoružanje i vojna oprema** su oružana, ubojna i tehnička sredstva, sredstva i sastavni dijelovi namijenjeni za opremanje, upotrebu, rukovanje, čuvanje, skladištenje, održavanje i nadzor oružanih, ubojnih i tehničkih sredstava, iz pozicije na najnovijoj „Zajedničkoj listi vojne opreme obuhvaćenoj Pravilima ponašanja Evropske unije o postupanju kod izvoza oružja“ („Službeni glasnik BiH“, broj 9/03).
- b) **proizvodnja NVO** je djelatnost koja obuhvata proizvodnju NVO, izradu NVO, proizvodnju dijelova NVO, modernizaciju NVO u miru, dizajniranje novih sredstava i sistema NVO, razvoj prototipova, projektiranje i konstruiranje, pojedinačnu i serijsku proizvodnju NVO, istraživanje i razvoj NVO i tehnologije za proizvodnju NVO, uključujući tehničku pomoć kao što su naredbe/uputstva, vještine, obuka, radno znanje i konsultantski servisi, odnosno tehničke podatke kao što su: detaljni planovi, dijagrami, modeli, formule, tablice, proizvodni nacrti i skice i specifikacije, priručnici i uputstva napisana ili zabilježena na drugim

medijima i napravama, vojnu stanardizaciju, verifikaciju NVO, sistem osiguranja kvaliteta NVO, kontrolu kvaliteta NVO i opremanje kapaciteta za proizvodnju NVO;

- c) **remont NVO** je održavanje ispravnosti i otklanjanje neispravnosti, uključujući modifikaciju i modernizaciju, delaboraciju/uništavanje municije, izradu, zamjenu i kompletiranje dijelova kroz srednji i generalni remont, reviziju kao i kvalitativni prijem remontovanih sredstava naoružanja i vojne opreme;
- d) **eksplozivi** su svako eksplozivno sredstvo koje uključuje eksplozive viskorazorne moći, TNT, DNT i RDX, inicijalni eksplozivi, niskoeksplozivna goriva, raketni motori i pojačivači, detonatori, upaljači, električni inicijatori (elektroupaljači), inicijalne kapsele i pripaljivači, inicijalna sredstva, uključujući i barut, upaljače za granate i sve druge tipove projektila, mina i bombi;
- e) **pirotehnički materijali** su mješavina hemikalija koje, kad se zapale, reagiraju egzotermički i proizvode svijetlost, toplotu, zvuk ili gas, a budući da mu je vrijeme sagorijevanja poznato, može se upotrijebiti i za usporavanje vatrenog lanca.
- f) **izvoz** je carinskim propisima uređeni carinski postupak prema kojem robe, tehnologije i usluge od strateške važnosti trajno ili privremeno napuštaju carinsko područje BiH, kao i prijenos softvera ili tehnologije elektroničkim medijima, telefaksom ili telefonom na odredišta izvan teritorija BiH, što se također odnosi na usmeni prijenos tehnologije telefonom samo kada je tehnologija sadržana u dokumentu čiji se relevantni dio očitava ili se opisuje putem telefona na način kojim se postiže potpuno isti ishod;
- g) **izvoznik** je pravno lice sa sjedištem na teritoriju BiH, registriran za obavljanje vanjskotrgovskog prometa i upisan u registar Ministarstva vanjske trgovine i ekonomskih odnosa BiH;
- h) **uvoz** je carinskim propisima uređeni carinski postupak prema kojem robe, tehnologije i usluge od strateške važnosti trajno ili privremeno ulaze na carinsko područje BiH, kao i prijenos softvera ili tehnologije elektroničkim medijima, telefaksom ili telefonom na teritorij BiH, što se naročito odnosi na usmeni prijenos tehnologije telefonom samo kada je tehnologija sadržana u dokumentu čiji se relevantni dio čita ili se opisuje putem telefona na način kojim se postiže potpuno isti ishod;
- i) **uvoznik** je pravno lice sa sjedištem na teritoriju BiH, registriran za obavljanje vanjskotrgovskog prometa i upisan u registar Ministarstva vanjske trgovine i ekonomskih odnosa BiH;
- j) **oružje i vojna oprema** podrazumjeva sve pozicije navedene na Zajedničkoj listi vojne opreme obuhvaćene Pravilima ponašanja Europske unije o postupanju kod izvoza oružja (u daljem tekstu: Zajednička lista vojne opreme);
- k) **usluge** podrazumjevaju pribavljanje koristi, prijenos prava te ostale poslovne aktivnosti koje se odnose na robe od strateškog značaja za sigurnost BiH, uključujući brokerske usluge i tehničku pomoć;
- l) **tehnička pomoć** je svaka pomoć u vezi s popravkom, razvojem, proizvodnjom, sklapanjem, testiranjem ili održavanjem roba od strateškog značaja za sigurnost BiH, koja može biti u obliku uputstva, osposobljavanja, prijenosa poslovnog znanja, stručnih ili savjetodavnih usluga. Tehnička pomoć uključuje usmene oblike pomoći, pisane ili govorne upute, obuke, prenošenje poslovnog znanja ili vještina ili savjetodavne usluge;
- m) **roba dvojne namjene** podrazumjeva sve pozicije navedene na Listi roba i tehnologija dvojne namjene (udaljem tekstu: Lista dvojne namjene), uključujući softver tehnologiju, koja se može upotrebljavati i u civilne i u vojne svrhe, te robu koja može biti upotrijebljena u neeksplozivne svrhe, ali koja na bilo koji

način može pomoći u proizvodnji ili širenju hemijskog, biološkog ili nuklearnog oružja ili bi mogla poslužiti za krajnju vojnu namjenu, odnosno koja je namijenjena krajnjem korisniku ili državi prema kojoj se provode sankcije Vijeća sigurnosti Ujedinjenih naroda (UN), Europske unije (EU) ili Organizacije za evropsku sigurnost i saradnju (OESS);

- n) **robe posebne namjene** čine sva nevojna sredstva za komercijalne svrhe koja mogu ugroziti sigurnost BiH navedena u Listi roba posebne namjene;
- o) **robe od strateške važnosti** podrazumjeva oružje, vojnu opremu, robe dvojne i posebne namjene;
- p) **prevoz** je carinskim propisima uređeni carinski postupak prema kojem se robe s kontrolnih lista prevoze preko carinskog područja BiH;
- r) **vanjskotrgovinski** promet je uvoz i izvoz roba i usluga od strateške važnosti za sigurnost Bosne i Hercegovine.

Član 4.

Prava i dužnosti organa uprave Federacije

Federalno ministarstvo energije, rudarstva i industrije (u daljem tekstu: Ministarstvo), putem Federalne direkcije za namjensku industriju (u daljem tekstu: Direkcija), vrši stručne i druge poslove i sa njima povezane upravne poslove iz nadležnosti Federacije u skladu sa članom 9. stav 4. Zakona o federalnim ministarstvima i drugim tijelima federalne uprave („Službene novine Federacije BiH“, br. 58/02, 19/03, 38/05, 2/06, 8/06 i 61/06).

III - PROIZVODNJA I REMONT NVO

Član 5.

Proizvodnjom i remontom NVO u Federaciji može se baviti samo pravno lice koje je na osnovu saglasnosti Vlade Federacije BiH (u daljem tekstu: Vlada FBiH) o ispunjavanju uslova za obavljanje proizvodnje NVO dobilo dozvolu od Ministarstva vanjske trgovine i ekonomskih odnosa Bosne i Hercegovine i koje je registrirano kao pravno lice za proizvodnju i remont NVO, a na osnovu njegove mogućnosti i sposobnosti proizvodnje sredstava NVO za potrebe oružanih i policijskih snaga u Bosni i Hercegovini ili u izvozu.

Suglasnost Vlade Federacije BiH iz stava 1. ovog člana izdaje se na osnovu mišljenja Federalnog ministarstva energije, rudarstva i industrije na Eleborat o osposobljenosti privrednog društva.

Eleborat treba da sadrži :

1. Rješenje o urbanističkoj saglasnosti,
2. Investicioni eleborat,
3. Lista proizvoda za koje se traži saglasnost,
4. Elaborat o osiguranju i zaštiti ljudi i objekata,
5. Obavještenje u vezi okolinske dozvole,
6. Lokacija objekta,
7. Dokazi o stručnoj osposobljenosti radnika,
8. Aktuelni Izvod iz sudskog registra.

Proizvodnjom, preradom i ugradnjom „B“ materije, koja obuhvata eksplozive i pirotehničke materijale iz člana 3. tač. d) i e), može se baviti samo pravno lice iz stava 1. ovog člana.

Pravno lice iz stava 2. ovog člana dužno je voditi evidenciju o utrošku „B“ materije po proizvedenim sredstvima, uništenim količinama „B“ materije koja ne zadovoljava propisani kvalitet (škart) i drugim evidencijama koje su bitne za kontrolu proizvodnje NVO.

Privredno društvo registrovano za proizvodnju i remont NVO dužno je imati tehničku dokumentaciju za proizvodnju i remont NVO ovjerenu od strane Ministarstva.

Pravna lica iz stava 1. ovog člana mogu se organizovati samo u obliku dioničkog društva ili društva sa ograničenom odgovornošću.

Član 6.

Prijedlog za oduzimanje dozvole

Ministarstvo može podnijeti Ministarstvu vanjske trgovine i ekonomskih odnosa BiH prijedlog za oduzimanje dozvole za proizvodnju i remont NVO iz člana 5. stav 1. ovog zakona u sljedećim slučajevima:

- a) ako je dozvola izdata na osnovu lažnih ili nepotpunih podataka;
- b) pravno lice ne posluje u skladu s odredbama Zakona o proizvodnji naoružanja i vojne opreme BiH, Zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine BiH, ovog zakona i podzakonskih akata kojima se uređuje ova oblast, a u ostavljenom roku ne otkloni uočene nedostatke;
- c) pravno lice onemogućava vršenje *nadzora* i kontrole;
- d) pravno lice ne sprovodi mjere sigurnosti, zaštitu ljudi i imovine, čuvanja-ehničko tehnološke dokumentacije i tajnih podataka;
- e) ako nastanu okolnosti ili dođe do novih saznanja, koja bi, da su postojala ili da se za njih znalo u vrijeme razmatranja zahtjeva za izdavanje dozvole, dovela do odbijanja zahtjeva za izdavanje dozvole;
- f) u propisanom roku ne uskladi svoja opšta akta sa odredbama ovog zakona.

Član 7.

Kooperacija

Pravno lice iz člana 5. stav 1. ovog zakona (finalista) ovlašteno je da, putem ugovora o kooperaciji prenese na kooperante u zemlji i inostranstvu dio svojih ovlaštenja o proizvodnji sredstava NVO o čemu je dužno obavijestiti Ministarstvo vanjske trgovine i ekonomskih odnosa BiH i Ministarstvo, u roku od sedam dana od dana potpisivanja ugovora.

Za realizaciju ugovora iz stava 1. ovog člana privredno društvo je dužno pribaviti saglasnost Ministarstva, na rok od jedne godine s mogućnošću produženja.

Za vrijeme trajanja ugovora o kooperaciji Ministarstvo i pravno lice iz stava 1. ovog člana finalista dužni su kontrolisati primjenu ovog zakona kod kooperanta.

Član 8.

Proizvodnja sredstava i remont NVO zasnovani su na izvoznim, odnosno uvoznim ugovorima, ugovorima s odgovarajućim institucijama BiH za potrebe oružanih i policijskih snaga u BiH, međusobnim ugovorima pravnih lica iz člana 7. stav 1. ovog zakona, kao i prema slobodnom tržištu o čemu su finalisti dužni obavijestiti Ministarstvo vanjske trgovine i ekonomskih odnosa BiH i Ministarstvo prije početka proizvodnje ovih sredstava.

U izuzetnim slučajevima, proizvodnja sredstava NVO i remont mogu biti zasnovani i na osnovu odobrenja Ministarstva vanjske trgovine i ekonomskih odnosa BiH.

IV - KAPACITETI ZA PROIZVODNJU I REMONT NVO

Član 9.

Kapacitete za proizvodnju i remont NVO, u skladu sa ovim zakonom, čine zgrade, mašine, infrastruktura, skladišta, dokumentacija, posebni alati i druga proizvodna sredstva i osoblje organizovani u sistem funkcionalno povezanih proizvodno-tehnoloških cjelina privrednog društva za proizvodnju i remont NVO.

Kapaciteti iz stava 1. ovog člana ne mogu se staviti u pravni promet (prodaja, zamjena, hipotekarno opterećenje, pljenidba i sl.).

U iznimnim slučajevima, kapaciteti ili dijelovi kapaciteta iz stava 1. ovog člana, izuzev osoblja, mogu se staviti u pravni promet samo uz saglasnost Vlade Federacije.

Član 10.

Izgradnja, modernizacija, rekonstrukcija i korištenje kapaciteta iz člana 9. ovog zakona zasniva se na potrebama tržišta i planovima razvoja i opremanja vojnih i policijskih snaga u Bosni i Hercegovini, a realizira se u skladu sa odredbama ovog zakona i drugih zakona iz područja odbrane, prostornog uređenja, zaštite okoliša, građenja i Zakona o unutrašnjim poslovima Federacije Bosne i Hercegovine („Službene novine Federacije BiH“, broj 49/05) i Pravilnika o zaštiti na radu pri proizvodnji eksplozivnih materijala (u daljem tekstu: POZREM).

Plan izgradnje, modernizacije, rekonstrukcije i korištenja kapaciteta iz stava 1. ovog člana donosi privredno društvo.

V - RAZVOJ NVO

Član 11.

Razvojem NVO može se baviti samo pravno lice iz člana 5. stav 1. ovog zakona.

Član 12.

Ministarstvo u skladu sa Zakonom o upravnom postupku („Službene novine Federacije BiH“, br. 2/98 i 48/99), na zahtjev pravnog lica iz člana 11. ovog zakona, može izdati saglasnost za razvoj novog sredstva NVO, uključujući i poboljšanje, modernizaciju i usavršavanje postojećih sredstava u slučaju:

- kada ima potpisan ugovor i od Ministarstva odobren ugovor za razvoj sredstava NVO;
- kada nema potpisan ugovor, a od Ministarstva ima odobrenje za razvoj sredstava NVO.

Pravno lice iz stava 1. ovog člana dužno je obavjestiti Ministarstvo vanjske trgovine i ekonomskih odnosa BiH i Ministarstvo, u roku od sedam dana od dana početka razvoja NVO.

Član 13.

Prava i obaveze svih učesnika u razvoju novih sredstava NVO utvrđuju se posebnim ugovorom između naručioca i nosioca razvoja tih sredstava.

Član 14.

Nosilac razvoja novih sredstava NVO i njegovi kooperanti obavezni su se pridržavati uputstava o istraživanju, razvoju i osvajanju sredstava NVO.

Privredno društvo dužno je tehničku dokumentaciju za osvojeno (razvijeno) sredstvo NVO dostaviti Ministarstvu na ovjeru.

Član 15.

Privredno društvo koje se bavi razvojem NVO dužno je da propiše i sprovede cjelovit sistem osiguranja kvaliteta sredstava NVO.

Član 16.

Delaboracija/uništenje municije

Pravno lice iz člana 5. stav 1. ovog zakona može obavljati delaboraciju/uništavanje NVO u Federaciji samo na osnovu sačinjenog elaborata o ispunjavanju traženih uslova za delaboraciju/uništavanje sredstava NVO, uz predhodno pribavljeno mišljenje Ministarstva.

Pravno lice iz stava 1. ovog člana dužno je elaborat sa datim mišljenjem dostaviti Ministarstvu vanjske trgovine i ekonomskih odnosa BiH, na nadležno postupanje.

Član 17.

Pravno lice iz člana 5. stav 1. ovog zakona može obavljati delaboraciju/uništavanje NVO iz vlastitog proizvodnog programa samo ako ima odgovarajuću opremu i tehnološki postupak, odobren od strane nadležnog organa upravljanja pravnog lica.

VI - PROMET NVO

Član 18.

Vanjskotrgovinski promet

Izvoz, uvoz usluga i roba sa Zajedničke liste vojne opreme može obavljati pravno lice iz člana 5. stav 1. ovog zakona samo na osnovu dozvole koju izdaje Ministarstvo vanjske trgovine i ekonomskih odnosa BiH.

Izvoz robe i usluga dvojne i posebne namjene može obavljati pravno lice iz člana 5. stav 1. ovog zakona samo na osnovu izvozne dozvole koju izdaje Ministarstvo vanjske trgovine i ekonomskih odnosa BiH.

Za uvoz roba dvojne i posebne namjene potreban je međunarodni uvozni certifikat koji izdaje Ministarstvo vanjske trgovine i ekonomskih odnosa BiH.

Član 19.

Izvještavanje

Korisnik isprave iz člana 18. ovog zakona dužan je izvjestiti Ministarstvo vanjske trgovine i ekonomskih odnosa BiH i Ministarstvo o njenoj realizaciji i dostaviti potvrdu krajnjeg korisnika da je roba iz isprave stigla na krajnje odredište sve u roku od 15 dana od dana realizacije.

Ako nakon izdavanja isprave dođe do promjene poslovnog partnera, krajnjeg korisnika, krajnje namjene ili drugih podataka iz isprave ili podataka na osnovu kojih je dobijena isprava, korisnik isprave dužan je o tome pismeno izvjestiti Ministarstvo vanjske trgovine i ekonomskih odnosa Bosne i Hercegovine i Ministarstvo u roku od osam dana od dana nastanka ili saznanja za nastanak promjene, radi obnove postupka.

Član 20.

Unutrašnji promet

Unutrašnji promet NVO može obavljati samo pravno lice iz člana 5. stav 1. ovog zakona.

Pravno lice iz stava 1. ovog člana ovlašteno je da, putem ugovora o kooperaciji prenese na kooperante dio svojih ovlaštenja o unutrašnjem prometu NVO o čemu je dužno obavijestiti Ministarstvo u roku od sedam dana od dana potpisivanja ugovora.

Za vrijeme trajanja ugovora o kooperaciji Ministarstvo i pravno lice iz stava 1. ovog člana dužni su kontrolisati primjenu ovog zakona kod kooperanata.

Član 21.

O ostvarenom unutrašnjem prometu iz člana 20. ovog zakona pravno lice - finalista je dužno voditi posebnu evidenciju.

Član 22.

Prodaja tehnologija i prijenos prava (licence)

Pravno lice iz člana 5. stav 1. ovog zakona u skladu sa Zakonom o upravnom postupku može zaključiti ugovor o licenci, kojim se samo uz naknadu, može prenijeti pravo na korišćenje softvera i transfera tehnologije za proizvodnju sredstava NVO i prodaja tehnologije i opreme, kao i drugih sličnih oblika poslovno-tehničke saradnje i kooperacije iz člana 7. ovog zakona, pravnom licu sa sjedištem u drugoj zemlji, samo na osnovu odobrenja Vlade FBiH po prethodno pribavljenoj saglasnosti Ministarstva.

VII - SKLADIŠTA I EVIDENCIJA NVO

Član 23.

Po svojoj namjeni u pravnim licima iz člana 5. stav 1. ovog zakona skladišta se dijele na:

- skladište gotovih proizvoda,
- skladište poluproizvoda,
- skladište sirovina (repromaterijala), i
- priručna skladišta.

Član 24.

Skladištenje proizvoda NVO, kao i repromaterijala, vrši se samo u objektima iz člana 23. ovog zakona, koji imaju odgovarajuću upotrebnu dozvolu i uputstvo za manipulaciju i evidenciju.

Član 25.

Pravno lice iz člana 23. ovog zakona obavezno je voditi urednu evidenciju uskladištenih proizvoda i repromaterijala i svakodnevnu promjenu stanja uskladištenih proizvoda i repromaterijala.

VIII - DUŽNOSTI

Član 26.

Pravno lice iz člana 5. stav 1. ovog zakona dužno je obavijestiti Ministarstvo vanjske trgovine i ekonomskih odnosa BiH i Ministarstvo o početku ili prestanku djelatnosti, statusnim promjenama i promjenama uslova potrebnih za obavljanje djelatnosti, u roku od sedam dana od dana nastanka promjene.

IX - SIGURNOST, ZAŠTITA I NADZOR U OBLASTI PROIZVODNJE, REMONTA I PROMETA NVO

Član 27.

Sigurnost i zaštita u oblasti proizvodnje, remonta i prometa NVO planira se, organizira i provodi u skladu sa odredbama ovog zakona, Zakona za proizvodnju naoružanja i vojne opreme BiH, Zakona o agencijama i unutrašnjim službama za zaštitu ljudi i imovine („Službene novine Federacije BiH“, broj 78/08), Zakona o kontroli kretanja oružja i vojne opreme („Službeni glasnik BiH“, broj 53/09), Zakona o zaštiti tajnih podataka („Službeni glasnik BiH“, br. 54/05 i 12/09), kao i drugim propisima koji regulišu ovu oblast.

Član 28.

Pravno lice iz člana 5. stav 1. ovog zakona dužno je planirati, organizovati i sprovesti sve neophodne zadatke i poslove bezbjednosti i zaštite u ovoj oblasti, a naročito:

1. izradu i provjeru planova organizovanja i provođenja mjera i postupaka osiguranja i zaštite tajnih podataka koji se odnose na kapacitete za proizvodnju, planove razvoja proizvodnje, tehničko-tehnološku dokumentaciju, poslovne odnose prema inostranstvu i objekte za proizvodnju;
2. izradu uputstava o nadzoru nad poštivanjem i provođenjem propisanih mjera fizičko-tehničke zaštite i osiguranja ljudstva, objekata, te posebnih mjera zaštite na radu, protupožarne i protueksplozivne zaštite, zaštite specijalnih alata i postrojenja kao i bezbjednost i zaštita prometa i skladištenja NVO;
3. izradu uputstava o vođenju evidencije o tehničko-tehnološkoj dokumentaciji o ugovorima sa kooperantima i kupcima u zemlji i inostranstvu;
4. izradu elaborata o bezbjednom skladištenju "B" materije i kontrole njenog utroška;
5. izradu uputstava o zaštiti poslovnih, finansijskih i drugih informacija u vezi proizvodnje i prometa NVO.

Član 29.
Tajni podaci

Pod tajnim podacima proizvodnje, prometa i remonta NVO razumjevaju se podaci o:

1. planovima proizvodnje i remonta NVO i njihovu ostvarenju;
2. programima istraživanja i razvoja NVO;
3. kapacitetima za proizvodnju NVO;
4. tehnološkom postupku proizvodnje NVO i konstruktivnoj dokumentaciji;
5. uslovima za izvoz i tranzit oružja, vojne opreme i usluga u vezi s oružjem i vojnom opremom.

Član 30.

Pravna lica iz člana 5. stav 1. ovog zakona dužna su:

- u skladu sa Zakonom o agencijama i unutrašnjim službama za zaštitu ljudi i imovine, organizovati vlastitu ili na osnovu ugovora sklopljenog u pismenoj formi sa agencijom koja je registrovana kao pravno lice za obavljanje poslova koji se odnose na zaštitu ljudi i imovine i obavlja se kao fizička ili tehnička zaštita ugovorenu unutrašnju službu za zaštitu ljudi i imovine;
- u skladu sa Zakonom o zaštiti tajnih podataka i ovim zakonom osigurati uslove za čuvanje tajnih podataka.

X - NADZOR NAD PROVOĐENJEM OVOG ZAKONA

Član 31.

Stručni nadzor

Stručni nadzor i kontrola nad provođenjem ovog zakona vrši Ministarstvo u skladu sa ovim zakonom shodno odredbama člana 11. Zakona proizvodnji naoružanja i vojne opreme („Službeni glasnik BiH“ 09/04 i 25/09), i Uputstva o načinu obavljanja stalnog nadzora i izvještavanja u proizvodnji i remontu naoružanja i vojne opreme („Službeni glasnik BiH“ br.28/04).

Postupak provođenja stručnog nadzora i kontrole Ministarstvo vrši putem Direkcije.

Ministarstvo propisuje način i djelokrug provođenja stručnog nadzora i kontrole proizvodnje, remonta i prometa NVO.

Član 32.

O provedenom stručnom nadzoru i kontroli proizvodnje, remonta i prometa NVO sačinjava se zapisnik koji sadrži:

- a) tačan naziv subjekta nad kojim se provodi stručni nadzor i kontrola;
- b) vrijeme i mjesto provođenja stručnog nadzora i kontrole;
- c) utvrđeno stanje;
- d) mišljenje o utvrđenom stanju.

Zapisnik iz stava 1. ovog člana dostavlja se Ministarstvu vanjske trgovine i ekonomskih odnosa BiH i Ministarstvu u roku od sedam dana od dana izvršenja stručnog nadzora, kao i drugim ovlaštenim institucijama na njihov zahtjev.

Član 33.

Nadzor nad provođenjem mjera fizičke i tehničke zaštite

Nadzor nad provođenjem mjera fizičke i tehničke zaštite vrše Federalno ministarstvo unutrašnjih poslova i kantonalni organi unutrašnjih poslova u skladu sa Zakonom o agencijama i unutrašnjim službama za zaštitu ljudi i imovine.

XI - KAZNENE ODREDBE

Član 34.

Novčanom kaznom u iznosu od 500,00 KM do 15.000,00 KM kaznit će se za prekršaj pravno lice ako:

1. ne vodi propisanu evidenciju iz člana 5. stav 3. ovog zakona;
2. suprotno članu 9. stav 2. ovog zakona stavi u pravni promet kapacitete za proizvodnju i remont NVO-a,
3. se suprotno članu 11. ovog zakona bavi razvojem NVO;
4. se suprotno članu 12. stav 1. ovog zakona bavi razvojem NVO bez saglasnosti Ministarstva;
5. obavlja delaboraciju/uništavanje municije bez prethodno pribavljenog mišljenja Ministarstva (član 16. stav 1.);
6. obavlja vanjskotrgovinski promet suprotno članu 18. st. 1., 2. i 3. ovog zakona;
7. u roku ne izvjesti Ministarstvo vanjske trgovine i ekonomskih odnosa i Ministarstvo o ispravi da je roba stigla na krajnje odredište (član 19. stav 1.);
8. suprotno članu 20. stav 1. ovog zakona obavlja unutrašnji promet;
9. suprotno članu 24. ovog zakona vrši skladištenje proizvoda NVO, kao i repromaterijala;
10. ne vodi propisane evidencije iz člana 25. ovog zakona;
11. ne obavijesti u roku Ministarstvo vanjske trgovine i ekonomskih odnosa BiH i Ministarstvo o početku ili prestanku djelatnosti, statusnim promjenama i promjenama uslova potrebnih za obavljanje djelatnosti (član 26.);
12. postupa suprotno odredbi člana 29. ovog zakona;
13. ne organizuje unutrašnju službu obezbjeđenja u skladu sa članom 30. ovog zakona.

Za prekršaj iz stava 1. ovog člana kaznit će se za prekršaj odgovorno lice u pravnom licu novčanom kaznom u iznosu od 500,00 KM do 3.000,00 KM.

Član 35.

Novčanom kaznom u iznosu od 5.000,00 KM do 15.000,00 KM kaznit će se za prekršaj pravno lice ako:

1. suprotno članu 22. ovog zakona obavlja prodaju tehnologija i vrši prijenos prava (licence);
2. suprotno članu 29. ovog zakona tajne podatke učini dostupnim neovlašćenim licima.

Za prekršaj iz stava 1. ovog člana kaznit će se za prekršaj odgovorno lice u pravnom licu novčanom kaznom u iznosu od 1.000,00 KM do 3.000,00 KM.

Član 36.

Ministarstvo je dužno protiv pravnog i odgovornog lica u pravnom licu podnijeti nadležnom sudu prekršajnu prijavu za učinjeni prekršaj iz člana 34. i 35. ovog zakona.

XII - PRELAZNE I ZAVRŠNE ODREDBE

Član 37.

Pravna lica iz člana 5. stav 1. ovog zakona dužna su svoja akta uskladiti sa odredbama ovog zakona u roku od šest mjeseci od dana stupanja na snagu ovog zakona.

Pravnom licu iz stava 1. ovog člana, koje u propisanom roku ne uskladi svoja opšta akta sa odredbama ovog zakona, danom isteka roka od šest mjeseci od stupanja na snagu ovog zakona prestaje da važi ranije izdata saglasnost za obavljanje djelatnosti proizvodnje, prometa i remonta NVO.

Član 38.

Federalni ministar energije, rudarstva i industrije donijet će u roku od šest mjeseci od dana stupanja na snagu ovog zakona provedbene propise, koji se odnose na uputstva i pravilnike iz člana 5. Poglavlja III., člana 10. Poglavlja IV, člana 11. Poglavlja V, člana 18. Poglavlja VI, i člana 28. Poglavlja IX, a kojima će se precizirati obavljanje proizvodnje, remonta, evidencije, istraživanja, razvoja i sistema kvaliteta, sigurnosti i zaštite na radu, nadzora i kontrole i prometa NVO.

Član 39.

Danom stupanja na snagu ovog zakona na teritoriji Federacije prestaje da važi Zakon o proizvodnji i prometu naoružanja i vojne opreme u Federaciji Bosne i Hercegovine („Službene novine Federacije BiH“, broj 79/07).

Član 40.

Ovaj zakon stupa na snagu osmog dana od dana objavljivanja u «Službenim novinama Federacije BiH».

Obrazloženje Zakona o proizvodnji, remontu i prometu oružja i vojne opreme u Federaciji Bosne i Hercegovine

I Ustavni osnov

Ustavni osnov za donošenje Zakona o proizvodnji, remontu i prometu oružja i vojne opreme u Federaciji Bosne i Hercegovine sadržan je u članu IV.A.5.20.d. Ustava Federacije Bosne i Hercegovine

II Razlozi za donošenje zakona

Svrha donošenje ovog zakona je zakonsko provođenje obaveza Federacije Bosne i Hercegovine na usklađivanju propisa u oblasti proizvodnje naoružanja, remonta i vojne opreme, proisteklim iz Zakona o proizvodnji naoružanja i vojne opreme („Službeni glasnik BiH“, br. 9/04 i 25/09) i u oblasti uvoza i izvoza naoružanja i vojne opreme i kontrole uvoza i izvoza proizvoda vojne namjene, proisteklim iz Zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine („Službeni glasnik BiH“, broj 103/09), kao i drugih bitnih pitanja u proizvodnji i prometu naoružanja i vojne opreme, a razlozi za njegovo donošenje sadržani su u objašnjenjima koja se daju kako slijedi:

Proizvodnja naoružanja i vojne opreme regulisana je Zakonom o proizvodnji naoružanja i vojne opreme („Službeni glasnik BiH“, broj 9/04), a Zakonom o izmjenama i dopunama Zakona o proizvodnji naoružanja i vojne opreme („Službeni glasnik BiH“, broj 25/09), koji je stupio na snagu 8. aprila 2009. godine, izvršena su određenja poboljšanja zakonskih odredaba iz ove oblasti. Ovim zakonom uređena su pitanja iz oblasti proizvodnje i remonta naoružanja i vojne opreme kao djelatnosti od općeg interesa, te druga pitanja od značaja za proizvodnju i remont naoružanja i vojne opreme.

Uvoz i izvoz oružja i vojne opreme i kontrola uvoza i izvoza proizvoda vojne namjene bio je regulisan Zakonom o uvozu i izvozu oružja i vojne opreme i kontrole uvoza i izvoza proizvoda vojne namjene („Službeni glasnik BiH“, br. 5/03, 33/03 i 14/05), s tim da je prestao važiti dana 8. januara 2010. godine stupanjem na snagu Zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine („Službeni glasnik BiH“, broj 103/09), kojim su propisani uslovi za izvoz, uvoz i tranzit oružja, vojne opreme, proizvoda dvojne i posebne namjene, te usluga u vezi s oružjem, vojnom opremom, proizvodima dvojne i posebne namjene.

Zakon o proizvodnji naoružanja i vojne opreme u Federaciji Bosne i Hercegovine („Službene novine Federacije BiH“, broj 79/07) koji je stupio na snagu 8. novembra 2007. godine, uređuje obaveze nadležnih institucija i privrednih subjekata Federacije Bosne i Hercegovine u provođenju Zakona o proizvodnji naoružanja i vojne opreme („Službeni glasnik BiH“, br. 9/04 i 25/09) i Zakona o uvozu i izvozu oružja i vojne opreme i kontrole uvoza i izvoza proizvoda dvojne namjene („Službeni glasnik BiH“, br. 5/03, 33/03 i 14/05) u oblasti kapaciteta za proizvodnju naoružanja i vojne opreme, proizvodnje naoružanja i vojne opreme, prometa naoružanja i vojne opreme, kao i druga pitanja iz oblasti proizvodnje i prometa koja nisu regulirana zakonima Bosne i Hercegovine.

S obzirom da su izmjene i dopune zakonske regulative na nivou Bosne i Hercegovine iz oblasti proizvodnje naoružanja i vojne opreme i oblasti kontrole izvoza, uvoza i tranzita oružja, vojne opreme, proizvoda dvojne i posebne namjene, te usluga u vezi s oružjem, vojnom opremom, proizvodima dvojne i posebne namjene od strateške važnosti za sigurnost Bosne i Hercegovine, stupile na snagu poslije stupanja na snagu Zakona o proizvodnji naoružanja i vojne opreme u Federaciji Bosne i Hercegovine, to je potrebno zakonsku regulativu iz ovih oblasti usaglasiti za cijelo područje Federacije Bosne i Hercegovine sa zakonskom regulativom donesenom na nivou Bosne i Hercegovine, a što do danas nije učinjeno. Ovo, tim prije, radi sigurnosti, zaštite, nadzora i inspeksijske kontrole u oblasti proizvodnje, prometa i remonta naoružanja i vojne opreme na području Federacije Bosne i Hercegovine.

U skladu sa članom 11. Zakona o proizvodnji naoružanja i vojne opreme („Službeni glasnik BiH“ 09/04 i 25/09), regulisano je da inspeksijski nadzor nad primjenom ovog zakona vrši ministarstvo spoljne trgovine i ekonomskih odnosa Bosne i Hercegovine a stalni nadzor vrši ministarstvo industrije entiteta, a što je regulisano Uputstvom o načinu obavljanja stalnog nadzora i izvještavanja u proizvodnji i remontu naoružanja i vojne opreme („Službeni glasnik BiH“ br.28/04) Ovaj Prednact zakona je u potpunosti usklađen sa odredbom člana 11. Zakona o proizvodnji naoružanja i vojne opreme („Službeni glasnik BiH“ 09/04 i 25/09) .

III. Usklađenost propisa sa Evropskim zakonodavstvom

Zakon je usklađen sa zakonskom regulativom donesenom na nivou Bosne i Hercegovine ali ne postoje propisi Evropske unije koji direktno uređuju materiju koja je predmet ovog zakona.

IV. Obrazloženje predloženih rješenja

U Poglavlju I - OSNOVNE ODREDBE (čl. 1. i 2.)

Obrazloženje za član 1.

Odredba člana 1. je usaglašena s obzirom na vokaciju propisa: sa odredbama Zakona o proizvodnji naoružanja i vojne opreme („Službeni glasnik BiH“, broj 9/04 i 25/09) i odredbama Zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine („Službeni glasnik BiH“, broj 103/09), koji je stupio na snagu 8. januara 2010. godine, a kako je to pobliže opisano u tački II ovog obrazloženja.

Obrazloženje za član 2.

Odredba člana 2. je usaglašena s obzirom na vokaciju propisa: sa odredbom člana 2. Zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine („Službeni glasnik BiH“, broj 103/09).

U Poglavlju II – ZNAČENJE IZRAZA (čl. 3. do 5.)

Obrazloženje za član 3.

Odredba člana 2. je usaglašena s obzirom na vokaciju propisa, i to:

- alineje a), b) i c) sa odredbom člana 2. i alineje d) i e) sa odredbom člana 3. stav 3. Zakona o proizvodnji naoružanja i vojne opreme („Službeni glasnik BiH“, br. 9/04 i 25/09),
- alineje f), g), h), i), j), k), l), m), n), o), p), r), s) i t) sa odredbom člana 3. Zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine.

Obrazloženje za član 4.

Odredba člana 4. je usaglašena s obzirom na vokaciju propisa: sa odredbom član 9. stav 4. Zakona o federalnim ministarstvima i drugim tijelima federalne uprave („Službene novine Federacije BiH“, br. 58/02, 19/03, 38/05, 2/06, 8/06 i 61/06).

U Poglavlju III - PROIZVODNJA I REMONT NVO (čl. 5. do 8.)

Obrazloženje za član 5.

Odredba člana 5. je usaglašena s obzirom na vokaciju propisa: sa odredbom člana 3. stav 1. Zakona o proizvodnji naoružanja i vojne opreme BiH,

Obrazloženje za član 6.

Odredba člana 6. je usaglašena s obzirom na vokaciju propisa: sa odredbom člana 12. Zakona o proizvodnji naoružanja i vojne opreme BiH.

Obrazloženje za član 7.

Odredba člana 7. je usaglašena s obzirom na vokaciju propisa: sa odredbom člana 4. Zakona o proizvodnji naoružanja i vojne opreme BiH.

Obrazloženje za član 8.

Odredba člana 8. je usaglašena s obzirom na vokaciju propisa: sa odredbom člana 5. Zakona o proizvodnji naoružanja i vojne opreme BiH.

U Poglavlju IV - KAPACITETI ZA PROIZVODNJU I REMONT NVO (čl. 9. i 10.)

Obrazloženje za član 9.

Odredba člana 9. je usaglašena s obzirom na vokaciju propisa: sa odredbom člana 6. Zakona o proizvodnji, remontu i prometu naoružanja i vojne opreme u Federaciji BiH, uz nomotehnički jasnije definisanje, s tim da se u izuzetnim slučajevima, kapaciteti ili dijelovi kapaciteta iz stava 1. ovog člana, izuzev osoblja, mogu staviti u pravni promet samo uz saglasnost Vlade Federacije, a ne Ministarstva.

Obrazloženje za član 10.

Odredba člana 10. je usaglašena s obzirom na vokaciju propisa: sa odredbom člana 7. Zakona o proizvodnji, remontu i prometu naoružanja i vojne opreme u Federaciji

BiH i odredbama Zakona o unutrašnjim poslovima Federacije Bosne i Hercegovine („Službene novine Federacije BiH“, broj 49/05, uz nomotehnički jasnije definisanje, kao i obavezu donošenje i primjenu Pravilnika o zaštiti na radu pri proizvodnji eksplozivnih materijala, radi zaštite ljudi i imovine.

U Poglavlju V - RAZVOJ NVO (čl. 11. do 17.)

Obrazloženje za čl. 11. do 15.

Odredbe čl. 11. do 15. su usklađene sa propisima Bosne i Hercegovine koji regulišu pitanje razvoja i modernizacije NVO i obaveza pravnih lica koja se bave razvojem i modernizacijom NVO-a. Isto tako, regulisana je i nadležnost Ministarstva po ovom pitanju.

Obrazloženje za član 16.

Odredba člana 16. reguliše pitanje da pravno lice iz člana 5. stav 1. ovog zakona može obavljati delaboraciju/uništavanje NVO u Federaciji samo na osnovu sačinjenog elaborata o ispunjavanju traženih uslova za delaboraciju/uništavanje sredstava NVO, uz prethodno pribavljeno mišljenje Ministarstva, kao i

Obrazloženje za član. 17.

Odredba člana 17. reguliše pitanje da pravno lice iz člana 5. stav 1. ovog zakona može obavljati delaboraciju/uništavanje sredstava NVO iz vlastitog proizvodnog programa samo ako ima odgovarajuću opremu i tehnološki postupak, odobren od strane nadležnog organa upravljanja pravnog lica.

U Poglavlju VI - PROMET NVO (čl. 18. do 22.)

Obrazloženje za čl. 18. do 22.

Odredbe čl. 18. do 22. su usklađene sa odredbama Zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine i regulišu pitanje prometa roba, tehnologija i prava (licenci). Isto tako, regulisana je i nadležnost Ministarstva po ovom pitanju.

U Poglavlju VII - SKLADIŠTA I EVIDENCIJA (čl. 23. do 25.)

Obrazloženje za čl. 23. do 25.

Odredbe čl. 23. do 25. definišu vrste skladišta, način evidencije roba u ovim skladištima, kao i način manipulacije uskladištenim opasnim materijama.

U Poglavlju VIII - DUŽNOSTI (član 26.)

Obrazloženje za član. 26.

Odredba člana 26. definiše način izvještavanja o početku ili prestanku djelatnosti, statusnim promjenama i promjenama uslova potrebnih za obavljanje djelatnosti proizvodnje, remonta i prometa NVO u pravnom licu, kao i zaštite ljudi i imovine.

U Poglavlju IX - SIGURNOST I ZAŠTITA U OBLASTI PROIZVODNJE I PROMETA NVO (čl. 27. do 30.)

Obrazloženje za čl. 27. do 30.

Odredbe čl. 27. do 30. su usaglašene s obzirom na vokaciju propisa: sa odredbama Zakona o proizvodnji naoružanja i vojne opreme („Službeni glasnik BiH“, br. 9/04, i 25/09), Zakona o agencijama i unutrašnjim službama za zaštitu ljudi i imovine („Službene novine Federacije BiH“, broj 78/08), Zakona o kontroli kretanja oružja i vojne opreme („Službeni glasnik BiH“, broj 53/09), Zakona o zaštiti tajnih podataka („Službeni glasnik BiH“, br. 54/05 i 12/09), kao i drugim propisima koji reguliraju ovu oblast.

U Poglavlju IX - NADZOR NAD PROVOĐENJEM OVOG ZAKONA (čl. 31. do 33.)

Obrazloženje za čl. 31. i 32.

Odredbama čl. 31. i 32., shodno odredbi člana 11. Zakona o proizvodnji naoružanja i vojne opreme („Službeni glasnik BiH“, br. 9/04 i 25/09), regulisan je način izvještavanja po pitanju stručnog nadzora nad provođenjem ovog zakona koje vrši Federalno ministarstvo energije, rudarstva i industrije u skladu sa ovim zakonom u pravnim licima iz člana 5. stav 1. ovog zakona.

Obrazloženje za član 33.

Odredbom člana 33., shodno Zakona o agencijama i unutrašnjim službama za zaštitu ljudi i imovine („Službene novine Federacije BiH“, broj 78/08), regulisano je pitanje nadzora nad provođenjem mjera fizičke i tehničke zaštite u pravnim licima iz člana 5. stav 1. ovog zakona.

U Poglavlju XI - KAZNENE ODREDBE (čl. 34. do 36.)

Obrazloženje za čl. 34. i 35.

Odredbama čl. 34. i 35. regulisani su prekršaji i pooštrene sankcije za pravna lica i odgovorna lica u pravnim licima, radi poštivanja odredaba ovog zakona.

Odredba člana 36. propisuje dužnost Ministarstva energije, rudarstva i industrije da protiv pravnog i odgovornog lica u pravnom licu podnese nadležnom sudu prekršajnu prijavu za učinjeni prekršaj iz čl. 34. i 35. ovog zakona.

U Poglavlju XII - PRIJELAZNE I ZAVRŠNE ODREDBE (čl. 37. do 40.)

Obrazloženje za čl. 37. do 40.

Ovi članovi sadrže uobičajene odredbe o usaglašavanju akata pravnih lica sa odredbama ovog Zakona, kao i odredbe o stupanju na snagu zakona.

V Finansijska sredstva

Za provođenje ovog Zakona nije potrebno izdvojiti posebna sredstva u Budžetu Federacije Bosne i Hercegovine.